

昌樂縣續志卷二十九

事功傳

不朽有三立功居次士君子乘時得位碌碌無所建白鄙已若夫  
置身顯要著績旂常秉鉞一方書勳竹帛下至一官一邑亦卓然  
有所設施遺愛在人斯乃不負所學亦邦人之光寵也作事功傳  
後漢

滕延

三國

孫乾

唐

昌樂縣續志

卷二十九

事功傳

一

張允濟

南唐

韓熙載

金

劉秀實

劉信

元

劉用

清

田慶增

閻學淳

閻學海

閻學涑

閻兆琅

陳汝禮

陳·枚

李華庭

滕子玉

于允中

趙錫齡

趙以恭

滕延字伯行北海人桓帝時爲濟北相時小黃門段珪家在濟陰與山陽侯覽並立田業近濟北界僕從賓客侵犯百姓劫掠行旅延一切收捕殺數十人陳尸路衢覽珪大怒以事訴帝延坐多殺不辜徵詣廷尉免後爲京兆尹有理名世稱爲長者後漢書循吏孫乾字公祐北海人也先主領徐州辟爲從事後隨從周旋先主之背曹公遣乾自結袁紹將適荊州乾又與糜竺俱使劉表皆如

昌樂縣續志

卷二十九

事功傳

二

意指後表與袁尙書說其兄弟分爭之變曰每與劉左將軍孫公佑共論此事未嘗不痛心入骨相爲悲傷也其見重如此先主定益州乾自從事中郎爲秉忠將軍見禮次糜竺與簡雍同等頃之卒三國志本傳

張允濟青州北海人仕隋爲武陽令以愛利爲行民化之境內不拾遺元武民以犝牛依婦家孳十餘犢將歸而婦家不與牛民訴縣縣不能決乃詣允濟允濟曰若自有令吾何與爲民泣其抑允濟因令左右縛民蒙其首過婦家云捕盜牛者命盡出其牛質何來婦家遽曰此婿家牛我無豫卽遣左右撤蒙曰可以此牛還婿婦家叩頭服罪遷高陽郡丞郡缺守兼統郡事吏民畏悅賊帥王

須拔攻郡糧屈吏食槐葉營節無叛者貞觀初累遷刑部侍郎幽州刺史卒

唐書循吏傳

韓熙載字叔言北海人也弱冠擢進士第同光末北海軍亂推熙載父光嗣爲留後明宗即位平北海光嗣見殺熙載來奔於吳放蕩嬉戲不拘名節里人趙氏女有殊色熙載娶爲正室連補和常滌三州從事亦晏然不介意烈祖受禪除秘書郎輔元宗於東宮熙載談笑而已不預世務及元宗即位拜虞部員外郎史館修撰於是始言朝廷之事所當條理者前後數上又吉凶禮儀不如式者隨事舉正由是宋齊邱之黨大忌之烈祖山陵元宗以熙載知禮遂兼太常博士時江文蔚判寺所議雖同而諡法廟號皆成於

昌樂縣續志

卷二十九

事功傳

三

熙載之手旣葬遷知制誥熙載性懶朝直多闕爲馮延巳劾奏罷其職陳覺等喪師南閩特赦不誅熙載上疏請置於法元宗手札敦諭而宋齊邱大怒乃誣以醉酒披猖黜爲和州司馬其實熙載生平不能飲久之徵爲虞部員外郎史館修撰拜中書舍人制誥典雅有元和之風建鐵錢之議遷兵部尙書旣而錢貨漸弊頗亦自悔奉使中原爲感懷詩二章署於館壁云未到故鄉時將爲故鄉好及至親得歸爭如身不到目前相識無一人出入空傷我懷抱風雨蕭蕭旅館秋歸來牕下和衣倒夢中忽到江南路尋得花中舊居處桃臉蛾眉笑出門爭向前頭擁將去又僕本江北人今作江南客再去江北遊舉目無相識金風吹我寒秋月爲誰白不

如歸去來江南有人憶或問江南何不食剝皮羊熙載對曰江南地產羅紬故爾時皆不喻迨熙載去乃悟使追之不及中原使至熙載接伴給曰老夫竊觀吾子音容氣貌一若先德况忝世舊故不可跪使者因拜之熙載才名遠布四方建碑表者皆載金帛求之爲文而常奉賜賚月不下數千緡廣納儒生苟有才藝必延致門下以舒雅之徒爲門生高第凡數十輩由是所用之資月入不供及奉使臨川借官錢三十萬所司以月奉預納熙載上書訴之云家無盈日之儲野乏百金之產累數百言後主批其奏云言僞而辯古人惡之熙載奉有常秩錫賚尙優而謂厨無盈日無乃過歟命有司放免逐月所刻料錢仍賜內庫絹百匹綿千兩以充時

昌樂縣續志

卷二十九

事功傳

四

服熙載上謝御批其略曰水火相濟日月無私旣示其瑕疵又憐其憔悴免逋欠使資於昏且賜綿絹令禦其風霜神造雖洪粉身未報熙載蓄女樂四十餘人不加檢束恣其出入與賓客叢雜後主累欲相之而惡其如此乃左受右庶子分司於外入朝辭復上表乞住闕下其略曰朽作無生之骨猶思仰慕於聖賢生爲萬物之靈甯使困窮於終老魂凝象闕心滯金門程限至終炎蒸漸盛重念臣向化將踰於四紀抒誠已歷於三朝無橫草之功可資於國有滔天之罪見絕於時陛下以無爲之心示好生之德雖一命已寬於時宥叨感深仁而再遷欲赴於遐征轉資陰德今則羸形愈憊壯志全消老妻對面而呻吟稚子環床而號哭勁風振節豈

得長寧逝水朝宗不堪永訣表上未報於是盡出羣婢使之卽散後主乃喜遂以爲秘書監羣婢俄集如初後主笑曰吾於今乃知卿之心矣復上書極諫時政論古今之得失書曰皇極要覽拜中書侍郎開寶三年病卒年六十三後主深痛惜之以爲不得熙載爲相欲追贈之前代有此否潘佑以爲晉劉穆之贈開府儀同三司卽其事也乃贈熙載平章事諡文靖葬梅嶺岡謝安墓側命集賢殿學士徐鉉集其遺文藏之書殿熙載才高氣逸無所卑屈舉朝未嘗拜一人初嚴續請熙載撰其父可求神道碑欲苟稱譽遺珍貨巨萬仍輟未勝衣歌妓姿色纖妙者歸焉熙載受之文旣成但叙其譜裔品秩而已續嫌之封還熙載熙載亦卻其贈宋齊邱

昌樂縣續志

卷二十九

事功傳

五

自著碑碣每求熙載寫之熙載以紙塞鼻或問之對曰文臭而穢喜提獎後進每見一文可采者輒卽繕寫仍爲播其聲名善譚論聽者忘倦審音能舞分書及畫名重當時見者以爲神仙中人

南唐

書本傳

劉秀實局量擴大才堪重任不爲近功速效先世蜀人隸籍滄州仕本州節度使改益都路總管卒於官寄葬益都至元十九年孫侍郎公乃改葬北海清惠鄉黃村東北原

黃村卽今龍角莊

墓前有碑記

劉信節度使公子資僮樂賑施襟宇冲澹初襲父益都路總判仕至朝散大夫遙授河中府同知金滅遂澹於仕進因訪父塋卜居密州之西境

卽今黃村

遭時板蕩再造家室優游林下延師教子雅

尙玄教尤喜與羽人遊若未嘗有名位者

補

劉用字行之河中府信第五子寬仁明敏飽讀儒書由宣課所提控案牘議事山東行省益都淄萊等路大督都府歷廉訪轉運司濟南益都淄萊三路與魯總管府知事山東路都轉運使司經歷益都淄萊等路管課提舉兼提舉淄萊等路課程事改密州鹽司副使歷任勤嚴抗言利弊民賴其利嘗率邏卒巡行信陽等場猝遇賊寇衆皆退避公力卻之民賴以安議者多其忠勇調膠萊莒密鹽司副使經畫有方民所未便盡汰除之圭撮之私不及於家公餘集名師益友講論經史士論稱之

補

田慶曾字介眉拔貢任辰沅僉事駐沅州沅經吳逆竊據民不堪

昌樂縣續志

卷二十九

事功傳

六

命慶曾履畝按稽開除浮派人始知太平之樂捐置賓田士林稱之

國史本傳

閻學淳字浩持號縈園恭定公循琦三子性端慤沈敏幼讀書過目不忘居恭定公喪時方成童哀毀幾逾禮經事生妣魏太恭人孝謹倍至年二十四舉乾隆癸卯鄉試甲辰成進士爲比部郎逾六年乞外補授江防同知遷知徐州陞淮陽道因公鑄級補河南彰德府知府調安徽廬州公潔己愛民尤能抉發疑獄淹滯塵牘下車卽爲以次剖決至義之所在則毅然爲之置恩怨利鈍於不顧徐州豐山閘爲河水衝突之處舊於泛漲時嘗決之以疏壅塞徐民實深被其惠時伏汎暴發當時議循舊例沿河居民惶懼奔

訴公曰河務非吾專任民則吾所治之民也力爭於上官得止土人刻石誌德嘗按視河工至雲潭口語諸僚佐曰此處險要勿以屢歲安流自諉逾時果驟決公督修有備民得安堵守彰德時滑縣教匪滋事滑距彰不百里城守兵無幾募練鄉勇日夜防守一夕城外大譟吏民惶惶譁言賊至方食奔告者屢馳諭民曰此非賊即賊有以禦之無恐民心遂定時頻年饑饉捐俸設粥廠收養老稚僕人張忠買一婦婦至哭不止詰之固有夫迫饑寒不能相保鬻以活母立遣去不責值別爲僕置婦冬捐俸作棉衣散給貧民廬州兵荒之後殭屍盈路出金瘞之流民呼號轉移捐俸置舍給米穀拯救甚衆有幼女三四歲棄道旁垂斃公聞卽收養長爲

昌樂縣續志

卷二十九

事功傳

七

擇壻嫁之自廬州乞養歸旋丁艱服闋補安徽甯國府知府署太平府事時災疫流行延醫製藥飢沿途散給治舊有翠螺書院特爲增置生徒給以膏火俾得肄業其中蓋公幼受業於濰縣韓理堂之門並濡染於家學得其所以立身淑世之道文學政治俱有淵源乙卯戊午分校南闈得人最盛所至政績爛然爲大吏所奇賞舊因督工役得足疾疾作告歸不復出以書史自娛不問門外事著有寶燕秀遠靜役諸集道光九年八月十三日卒年七十歲子兆榕候選州吏目繼子兆樛見本傳

閻學海字星持號雨帆恭定公循琦季子三歲而孤生妣胡太恭人撫之成立六歲就傅授讀舉止若成人值歲大禋以黍餅進母

自噉灰菜懽然如飴年十五入邑庠旋試優等食餼受知於督學  
阮芸臺先生以公試詩示諸生亟賞之尋貢太學登賢書迫於家  
貧親老以舌代耕桂萼十餘年選授文登教諭瀕行有王章縱不  
遭妻怒毛義何由答母慈之句蓋歉於官卑未能副孝養之思也  
居教職一劣生好訟召至跪日中嚴誠之生感悟改行爲善士有  
諸生爲縣役所誣力白之一邑頌德自戊午登賢書九上春官不  
第至嘉慶丁丑始成進士除舍人歸省旋遭母喪初公捷秋闈太  
恭人以恭定所遺帶硯賜之命曰吾子顯達有日努力前進勿墜  
家聲也公泣受教困頓幾二十年始成名博恩榮以慰母而母一  
病不起哀毀骨立泣下皆血貧無以葬遠走二千餘里求賻於外

始克勉成大事服闋赴都襤被蕭然長安道上不知其爲官也及  
直內閣由中書署侍讀所擬票底精確的當前後輩皆莫及論俸  
當陞侍讀公介節自持不少折或咎之公毅然曰吾守吾職以行  
吾義而已勿營營爲也卒出爲起居注主事去之日以票本條目  
遺閣內繼事者奉爲圭臬備書傳錄徧都中自起居郎累俸六年  
陞戶部浙江司員外郎道光二十六年冬部長奏派爲寶泉局監  
督公凌寒赴局察鼓鑄往返勞頓卒於官時年七十有四蓋公之  
學本自家傳復裁正於濰邑韓理堂先生公先生子壻也故學行  
精純風格峻上如此著有帶硯堂詩古文詞藏於家  
閻學洙字紫巖號信持循霽子乾隆丁酉科鄉試舉人援例授工



部主事歷任營繕司員外郎都水司郎中選甘肅蘭州府知府調甘州府護理安肅兵備道署甯夏府水利同知涼州府茶馬同知慶陽府知府事甘州西距黑水撫彝張掖二境恃以溉田歲大旱以爭水起釁兩縣民互鬪毆傷廳縣官提督發兵五百名彈壓因激變適公他出聞信兼程歸時兩縣民聚衆數萬於郡城西南公單騎招撫之曰吾來救爾數萬生命也父老紳士俱叩頭流涕公入龍王廟坐定謂之曰勢已至此速獻倡亂者事可結頃刻縛八人至父老紳士同聲哀號公惻然許以無死罪因忤上意終以八人成案治慶陽時捐俸修葺書院延師訓課諸生貧乏者格外體恤性慈好施寧州知州王某卒於任子幼貧不能歸葬公贖資送

昌樂縣續志

卷二十九

事功傳

九

其靈輿回籍安化縣典史李某以大計罷職潘某以罪悞去官相繼告貸時公已卸事典質以應其求至上憲年節之敬羊酒外無他餽贖嘗語人曰寧流落他鄉不欲取下奉上遺禍後人在甘省十有八年及歸家計蕭然晏如也道光十三年卒壽八十有六

閻兆琅字秀崑號閬峰嘉慶辛酉科拔貢由官學教習授四川樂山縣知縣引見改湖南酃縣酃舊俗告期呈詞必納錢胥吏公出示革其弊歲旱民以爭水道致訟公慰之曰予昨謁城陽爲汝祈三日當雨旣果大雨民懽舞頌德江西僑寓年久讀書者衆公整泚泉書院復別建客籍書院課之調署清泉繼調湘陰後提授衡陽去酃之日士女遮道攀轅三日始出境客籍爲建生祠其去湘

陰也替代者爲魯公以盤交作難逼留邑民聚數百登堂爲公辨  
理號咷大痛聲徹中外魯感愧放公行民隨行三十里固卻之乃  
止稽首道旁涕泣不能仰視公亦戀戀爲感泣任衡陽三載政聲  
日著值縣試公以事赴省垣擬託某公代試士子不肯曰願俟闈  
父母回再試公之德化其取信於民類如此罷官鄉居依然寒素  
著有三隱筆記藏於家

陳汝禮字子儀號立夫邑諸生援例授江蘇丞西使賞藩踰流沙  
越弱水經野人界人咸傷異域公隨地吟詠自若藩王酬贖弗受  
歸攜所產一豐一芋各三十斤判海州以六百金購何首烏不自  
食馳獻長兄柏園後柏園果康而壽海州故多鹽梟胡大成爲之

昌樂縣續志

卷二十九

事功傳

一〇

魁所爲不法莫敢誰何公至廉得其殃民狀白上官請逮大成上  
官難之退部勒其民得兵數百人搗賊穴天將曙忽霧衆莫敢前  
公奮身先入一賊飛刀奔公公急揮鐮滅其鼻喝衆同進擒大成  
獲銅管攢竹礮四十八枝允散其從者州內用是大安事聞特超  
署知州任將就職母韓孺人謂之曰汝除民害固宜但胡大成等  
因勸懲之不早罪釀不赦而子又利其功非吾願也遂致仕歸性  
喜聚書集凡數百種好岐黃術精眼科值時疫按病施藥且歲以  
爲常道光間歲屢饑出粟賑濟親朋貧乏者或爲置田或恤其家  
或客終其身懿行不勝枚舉道光二十六年卒年六十有四  
陳枚字簡甫號琴山汝庚第四子弱冠補諸生道光甲午科舉於

鄉庚子成進士歷官翰林院編修國史館纂修癸卯科湖南鄉試正考官乙巳丁未會試同考官擢浙江道監察御史轉刑科給事中掌兵科印奏疏迭陳皆侃侃正言無忌諱放四川永寧道是時髮逆窺蜀防禦維艱選士勵兵勤勞卓著署四川按察使離永寧已數月矣乃以屬吏有失守城池者罪誤鐫級人曰歲月可按也盍辨諸公謂於事君率下之道皆有所歉顯晦一委之命卒不辨未幾詔入都授貴州銅仁府知府地處邊陲苗獠時順時判撫勦兼施德威並著或軍餉不繼輒捐資督練旋陞貴東道當其之任貴東也未入境遇有冤民數百絡繹於道詢之僉係呈控豪猾李東狗者東狗結交撫憲橫暴一方官府亦莫敢伊何公抵任廉得

昌樂縣續志

卷二十九

事功傳

一一

其情乃假邀宴請其到署至則扃門逮捕卒置於法人心大快貴東民風強悍勤於械鬥且有溺女惡習公於聽政之暇會其耆老勸以巽言禁以嚴法期年而革其陋俗民至今猶頌禱焉公族戶丁甚繁與鄰村濰境某族累世有睚眦嫌動輒爭鬪又窮丁羸戶間有販賣私鹽者公恆以二事爲慮雖宦遊數千里外猶頻以睦鄰務本寄書切勸族人公性剛毅不喜諂諛卒與上峯不合告病歸同治三年九月九日卒於青江旅次公沒之年貴州兵因勦匪道經濰縣聞公已沒全軍往城南馬紹野墓前祭奠多泣下者公寄居濰縣城內著有琴山詩鈔軍中筆記讀史隨筆長子文然字斐卿光緒己卯科舉人丙戌科進士卽用知縣改選沂州教授著

有種蘭小草長孫祖基字繩武光緒乙酉科拔貢歷任觀城福山縣訓導著有松鶴亭詩鈔次孫祖塘字子元光緒丁酉科舉人歷任河南桐栢偃師山東青城齊東等縣知事著有燹餘吟草蒙古紀程治青案牘均刊行於世

李華庭字清遠號蓮塘父中和爲時名儒隱居講學及門之士率皆名流公幼承庭訓力學攻苦乾隆戊申舉於鄉嘉慶丙辰成進士由翰林院庶吉士授吏部額外主事改文選司主政選廣東直隸羅定州知州陞署南雄惠州肇慶府知府所至釐剔積弊愛民如子尤慎重學校下車伊始必先整飭書院捐廉課士振衰式靡以端其本嘗謂僚屬曰吏治之壞原於士習不端斯世風日漓民

昌樂縣續志

卷二十九

事功傳

一一一

情遂益以僞果興學育材有以植其基而接之以誠則根固民親而化行矣時以爲名言蓋公始因文學之選出而治民即本學道愛人之訓以爲治守惠州時有姦民爲亂逮捕多株連無辜公審知其情白於大府分別首惡脅從良民釋放歸農民皆感德其悉心愛民皆類此第愛親情切任肇慶僅三閱月即告終養士林惜之

滕子玉字青田號藍村幼讀書與伯兄子駿仲兄子楨兄弟自爲師友性嗜讀每至夜分不輟嘉慶戊辰舉於鄉道光壬午成進士選庶吉士明年散館改知縣初授湖南嘉禾縣引見奉旨調福建平和縣平和潭南下邑民俗健鬪蒞茲土者謂非威猛不辦公顧

一切簡靜每聽斷諄諄婉勸以釋怨捐忿睦鄰安業未嘗輕用鞭朴有藏金白粲中進者立返其金管其人或議公迂緩公曰民所以爭非財則氣而已官以黷財倡於上是導民縱火也官以盛氣激其間是爲民添薪也且民吾子也不素教而驟責之心何安乃力整九和奎文兩書院振幽滯做浮囂優行者褒賞之貧不能娶者依助之民心翕然向風緣事鐫級引見恩旨仍留閩補用適臺匪亂起公以解餉軍營功加知州銜署光澤縣事值歲大饑公市米江西復查藏粟家平糶定價鄰邑搶劫累累光澤晏然如未始有饑公未蒞任前西商私貸光澤民錢二十六萬有奇歲當納子銀三萬二千商窘迫不能納兩造鳴官大府定議分八年還本無

息錢牒縣如議公謂虧民利商力持不可遂奪職踰歲復舊職例當請咨引見公前以辦荒虧倉穀千餘石羈留踰年民慨然代還始治裝北上抵錢塘卒於舟次公之去平和也邑人千百人乞留於大府不獲呼號攀挽至七日方出境居光澤部民供薪水積二年餘無倦色聞公訃爲位於書院哭之如其私親且爲鳩賻謀旋公之柩方之古循良其得人心之盛殆不是過著有卮言新書藏於家

于允中字傳一號喬東少英敏過目輒成誦遊庠後讀書程符山每作一藝傳誦四方諸名宿莫不爲之擊節嘉慶丁卯舉於鄉辛未成進士授戶部主事選直隸深澤縣知縣深澤地磽民貧雜稅

煩重公悉爲罷免吏白曰官俸無幾吾輩衣食悉仰給雜稅若罷免何以堪曰吾知爲官當澤民奚卹其他三年聲政大著移湖南宜陽縣遂告歸行李蕭然惟一書僮相隨途中有句云兩袖清風猶故我三年惠政許澤民歸後吟詠自適卒年七十八歲著有喬東詩古文詞藏於家

趙錫齡字與三少入邑庠以能詩名再試秋闈不售乃援例報捐知縣指分直隸以吏事精敏特爲上游所器到省三載授清河縣知縣甫下車倡建書院延宿儒主講以端士習民病徭重設法免之邑民立石銘德先是天津民夷交鬪郡守以下皆獲譴官直隸者懲前事理民教訟多袒庇公力矯其習民復製匾頌德旋丁外

昌樂縣續志

卷二十九

事功傳

一四

艱去官百姓攀轅泣送相屬於路服闋起復回省迭承要委積瘁成疾卒於保陽差次公家故饒於財咸豐辛酉之變嘗獨力築黃埠堡光緒丙子歲饑出粟助賑家貲耗折過半清河故瘠區公歷舉諸惠政餘俸不敷率取諸家其卒之前一年回籍措資家人或諷言貧之爲害公曰吾知貧之爲害故濟貧不敢不力猶人之不怠封殖亦各從所好耳卒年四十有九其孤逢昌奉柩歸葬檢公墓惟名畫十餘軸及所撰遊讌詩稿而已

趙以恭字執敬爲人廉正和粹出任瀘溪縣典史盜以德化獄以恩勸值夏旱躬率瀘民祈禱靈雨滂霈人以爲至誠所感案獄有投金求解者概斥去及解組瀘民攀留不獲鐫石誌德

